

KERATAN AKHBAR

TARIKH : 9 JANUARI 2024
AKHBAR : BERITA HARIAN
MUKA SURAT : 23

Hutang negara dijangka mula berkurangan menjelang 2028

Hutang negara dijangka mula berkurangan menjelang 2028

Program penyasaran semula subsidi bolehkan kedudukan fiskal lebih kukuh

Oleh Mahanum Abdul Aziz
mahanum_aziz@bh.com.my

Paras hutang negara dijangka mula menampakkan pengurangan menjelang 2028 dengan pengukuhan fiskal berterusan dan sasaran defisit dicapai seperti yang ditetapkan, demikian menurut Menteri Ekonomi, Rafizi Ramli.

Beliau berkata, sasaran defisit fiskal 5.0 peratus bagi 2023 dijangka mampu dicapai, begitu juga dengan sasaran defisit bagi 2024 sebanyak 4.3 peratus yang dijangka boleh dicapai susulan penyasa-

ran semula subsidi.

Katanya, dengan paras defisit sebanyak 3.5 peratus dapat dicapai menjelang 2025, ia akan menjadi titik penting yang akan mencerminkan pengurangan hutang akan berlaku selepas itu.

"Kalau kita terus dengan sasaran pengukuhan fiskal yang kita ada, menjelang 2028 kita akan mula melihat hutang kita berkurangan dan caj bayar hutang berkurangan.

"Kalau pertumbuhan ekonomi yang dijana menerusi bidang berpertumbuhan dan bernilai tinggi (HGHV) baharu menampakkan hasil, pengurangan hutang akan menjadi lebih pantas mengatasi apa yang kita rancangkan," katanya.

Beliau berkata demikian pada Majlis Amanat Menteri Ekonomi yang diadakan di Putrajaya, semalam.

Akhir tahun lalu, Rafizi menyatakan bahawa kerajaan akan melaksanakan program subsidi bersasar RON95 pada tahun ini sebagai langkah untuk mengoptimalkan sumbernya kepada

golongan yang paling memerlukannya.

Cari kaedah gerakkan sumber

Beliau pada masa itu berkata, sebuah negara apabila T20 menerima 53 peratus daripada subsidi bahan api yang menyeluruh bukan satu model yang mampan dan juga bukan sebuah model yang saksama.

"Usaha ini sejajar dengan kedudukan kerajaan dalam meluaskan paradigma fiskal. Berdasarkan kewangan awam kita yang

mengalami defisit fiskal lebih 5.0 peratus selama tiga tahun berturut-turut, kita perlu mencari kaedah baharu untuk menggerakkan sumber kita dan mengurangkan pembaziran dalam sistem," katanya.

Rafizi berkata, melaksanakan program penyasaran semula subsidi pada akhir 2024 akan segera membawa kepada kedudukan fiskal yang lebih baik untuk negara.

Malaysia kini dilaporkan negara ketiga tertinggi dunia untuk subsidi petrol.

Harga petrol RON95 negara ini adalah antara termurah di dunia dengan kadar RM2.05 sen seliter, malah lebih murah berbanding Arab Saudi, pengeluaran minyak utama dunia (RM2.94).

Pada pembentangan Belanjawan 2024 pada Oktober tahun lalu, Perdana Menteri, Datuk Seri Anwar Ibrahim yang juga Menteri Kewangan berkata, keterlanjuran lalu mengakibatkan hutang dan liabiliti negara menjangkau RM1.5 trilion atau 82 peratus kepada Keluaran Dalam Negara Kasar (KDNGK).

Beliau berkata, bayaran khidmat hutang sahaja dijangka mencatat RM46.1 bilion atau 15.2 peratus daripada hasil 2024.

Justeru, kata Perdana Menteri, hanya dengan mengurangkan defisit dan tanggungan, kerajaan dapat mengembalikan kedudukan fiskal negara yang mampan.

Dalam Belanjawan 2024, kutipan hasil kerajaan pada 2024 dijangka menyaksikan peningkatan kepada RM307.6 bilion berbanding RM303.2 bilion tahun sebelumnya.

"Kalau pertumbuhan ekonomi yang dijana menerusi bidang berpertumbuhan dan bernilai tinggi (HGHV) baharu menampakkan hasil, pengurangan hutang akan menjadi lebih pantas mengatasi apa yang kita rancangkan."



Rafizi Ramli,
Menteri Ekonomi